

Poesia in dialetto
"SGUNDEN"

La Véla di Barón e la so genta

L'era 'na frasiòn con abota genta
ma gh'era tött pr'ogni eveniensa,

frèr, maringón, calculèr, sartur,
a gh'era anca Giavarén capmastar müradur.

La furnasa ad Marchi con tött i quadarlén,
famii intregghi i lavuraven in dl'èra da cutmén.

I sit ad Cavali, la curta dal Fnìl bas
cm'al casèl e la cà di paisàn cm'i so ragàs.

Al göbb Danèli al fava i zachét cm'al braghi,
al vec' Frarén i cancei cm'al fradi.

Mintén al calculèr al giüstava al scarpi,
so muiera la cüséva calset e siarpi.

Frasén e Camural, maringón caradur,
Gazola cm'i so aliév un bon sartur.

I barbér Mora in cà ad Frasén i gh'aven la butega,
al sabet e la dumenica i cuntintaven la clientela.

A gh'era l'ustaria con anca la butega,
tött al dóni i gh'andaven a far la spesa,

in dal curtil al zög dal bocì,
divertiment e pasatemp pr'ansian e soci.

Al més ad Mag' tött asvén a la Maduné'na
a séntar al rusari dét da la Cristé'na,


l'era anca un incuntrares ad tant resident
par far quatar ciac'ri sura ogni aveniment.

Par Pasqua, la sagra d'la frasiòn
cm'al festivàl e i cuncert "Bocchia e Galli" o i "Cantón".

Al Lündé dl'Angil i Sgunden a föra porta
par spendar i poch franch ancora ad scorta;

do féti 'd salam in dl'ustaria, un quartén 'd Barbéra
e po' drétt a far quatar salt in d'la baléra.

Ien sparì i rusari, ien sparidi al sagri cm'al so tradisiòn,
al prugrès l'à cambià tött in d'la me frasiòn.



Remo Allegri